



SIARAN MEDIA

KEMENTERIAN SAINS, TEKNOLOGI DAN INOVASI

MALAYSIA TECHLYMPICS 2024 PERINGKAT ZON SELATAN CAPAI PENYERTAAN SERAMAI 1,350 ORANG PESERTA

BATU PAHAT 12 September 2024 – Malaysia Techlympics merupakan inisiatif MOSTI dalam usaha memupuk minat generasi muda terhadap Sains, Teknologi, Kejuruteraan dan Matematik (STEM) melalui pendekatan pertandingan yang lebih menyeronokkan, membudayakan belia dengan minda kritikal, set kemahiran dan inovasi yang lebih bermakna serta berimpak tinggi.

Penganjuran Malaysia Techlympics 2024 Peringkat Zon Selatan merupakan pelaksanaan zon ketiga setelah pelaksanaan di Zon Timur dan Zon Sabah. Malaysia Techlympics 2024 Peringkat Zon Selatan telah menyaksikan seramai lebih 1,350 orang peserta dari negeri Johor, Melaka dan Negeri Sembilan yang berkumpul di Dewan Sultan Ibrahim, Universiti Tun Hussein Onn Malaysia, Parit Raja Batu Pahat untuk bersaing bagi melayakkan diri ke Peringkat Akhir Kebangsaan yang akan diadakan pada bulan November 2024 di Putrajaya.

Dalam ucapan perasmian oleh YBhg. Dato' Ts. Dr. Hj. Aminuddin Bin Hassim, Ketua Setiausaha MOSTI berkata 'matlamat dan objektif utama penganjuran Malaysia Techlympics adalah pembudayaan sains, teknologi dan inovasi (STI) kepada kumpulan sasar melalui pendekatan *hands-on* dan tidak formal serta berdasarkan kaedah *experiential learning* dan pertandingan melibatkan pelajar dan belia di semua peringkat umur, jantina dan bangsa'.

Pada masa ini aktiviti yang diperkenalkan lebih berfokus untuk memupuk dan meningkatkan minat terhadap STI serta menggalakkan penghasilan idea inovasi dan mencungkil bakat dalam kalangan rakyat Malaysia. Aktiviti ini melibatkan golongan sasar pelajar bermula dari peringkat sekolah rendah, sekolah menengah dan belia berumur 18 tahun hingga 40 tahun.

Melihat kepada kepentingan teknologi kepada negara, pengisian aktiviti dan pertandingan Malaysia Techlympics turut menekankan aspek teknologi terkini seperti kecerdasan buatan, pengekodan, pengkomputeran, dron dan banyak lagi sebagai wadah dan pendedahan awal bagi para pelajar dan belia.

Program ini turut dihadiri oleh Yang Berhormat Datuk Fairul Nizam bin Roslan, EXCO Sains, Teknologi, Inovasi dan Komunikasi Digital Melaka dan YBhg. Prof. Dato' Ir. Ts. Dr. Ruzairi Bin Abdul Rahim, Naib Canselor Universiti Tun Hussein Onn Malaysia (UTHM).

Untuk maklumat lanjut mengenai Malaysia Techlympics dijemput untuk melayari laman web rasmi www.mytechlympics.com

Disediakan oleh,

KEMENTERIAN SAINS, TEKNOLOGI DAN INOVASI

12 September 2024